



大清穆宗繼天開運受中居正保大定功聖智誠孝信敏恭寬
毅皇帝實錄卷之二百六十三

同治八年己巳七月丙戌諭內閣賈楨等奏外城練勇酌擬
改併請旨遵行一摺外城設局練勇本屬一時權宜之計現
在地方安謐自應酌量裁併著照所請外城練勇二百五十
名均著一併裁撤即將此項練勇分屬五城由各該城歸併
原募局勇認真挑選酌量定額以供緝捕之用其部撥練勇
銀每月一千兩卽由五城支領該城本有緝捕盜賊之責其
各督飭司坊官員實心經理整頓捕務所有各部院衙門及
投效當差人員卽著概行裁撤至此項人員向由五城御史

等隨案請獎。嗣後並著一併停止。○諭軍機大臣等。禮部奏。接到朝鮮國王咨文。以鴨江之北。鳳城之外。游民蓋屋墾田。請嚴行禁止。據情轉奏一摺。奉天邊外游民私墾。聚眾日繁。前經延煦等前往查勘。酌擬章程呈覽。內有推展邊界及嚴定邊禁各節。疊經諭令都興阿等悉心籌畫。酌覈辦理。此事關繫中外邊疆。若不及早經理。漫無限制。恐該游民等任意侵越。漸及朝鮮柵路。致該國居民不無疑慮。殊非朝廷綏輯藩封之意。著都興阿。額勒和布。恩錫。懍遵前旨。迅速籌辦。並將如何辦理情形。據實具奏。毋得畏難苟安。稍存膜視。並著禮部查照向章。行知朝鮮國王。慎守邊境。如有游民私越滋

擾情事。即行照例懲辦。禮部原摺並朝鮮國王咨文。著鈔給都興阿等閱看。將此諭知禮部。並諭令都興阿。額勒和布。恩錫知之。○丁亥。

文宗顯皇帝忌辰。遣官祭定陵。○上詣奉先殿。壽皇殿行禮。○諭軍機大臣等。崇實。吳崇奏。請將各省應協滇餉。匯川轉解一摺。前經戶部議撥滇餉。當經諭令四川等省。按月提交滇省委員。陸續領解。茲據崇實等奏稱。接據岑毓

寶鏡卷之三
英來函。以滇省軍務。正在得手。需餉萬分緊急。兩湖江浙等省協餉。若專恃委員提解。難應急需。請於四川重慶設立滇餉總局。並派員前往各省坐催。即將餉銀由商號匯至重慶。由總局轉解滇省等語。所奏自係為轉輸迅速起見。著馬新貽。劉坤一。李瀚章。李鴻章。郭柏蔭。劉峴。即將江西浙江湖北湖南等省應解滇餉。按月提交該委員等。就各省商號匯川源源轉解。至四川省應協滇餉。並著按月就近撥解。以濟要需。其四川墊解銀四萬五千兩。即著於各省協餉過境時。如數截留歸款。現在滇事既有轉機。餉需亦已有著。劉嶽昭。岑毓英。務當督飭將士。速解省圍。力圖掃蕩。毋稍延緩。將此由五

百里各諭令知之。○成都將軍崇實等奏。請飭湖南在籍丁憂道員鄧錡前赴貴州軍營帶勇勦賊。允之。○予貴州窄王苗寨傷亡總兵官鄧鴻超祭葬世職加等。附祀參將吳洪貴甕安縣專祠。○戊子。諭內閣。御史袁方城奏。司坊官縱盜貽害。請飭查究辦。一摺。司坊各官。原以詰捕盜賊。乃據該御史奏稱。近來匪徒麇集。白晝攫人財物。城外窮民。進城典質。或置買器用。有被夥黨分奪之事。赴各衙門控訴。各該司坊官均置若罔聞。而中城為尤甚。實屬捕務廢弛。殊堪痛恨。著巡視中城御史將督捕不力之官役。查叅懲辦。並著五城御史整飭司坊各官。查拏盜賊。並妥議章程。以期有犯必獲。俾奸

寶鑑卷之三十三
三
究斂戰。以靖地方。尋奏京城地面盜賊橫行。固由司坊官督捕不力。亦由捕役畏葸無能。現擬於各城適中之地。設局練勇。嚴密巡查。並立功過格以定優劣。酌提練勇經費以獎勤奮。下部議從之。○諭軍機大臣等。馬新貽奏。鼎軍勇丁。前在韓莊地方滋事。疊經諭令馬新貽等派員彈壓。茲據馬新貽奏稱。該軍抵宿遷後。經總兵潘鼎立等。將滋事勇丁魯萬澄等查出正法。鼎字左營。先行遣撤。所發欠餉。仍照淮軍向例發給。其籍隸江浙之遣勇。沿途亦屬安靜。各情刻下該軍分起行走。自可漸臻安貼。惟若輩桀驁性成。究未可稍涉寬弛。仍著馬新貽

嚴飭潘鼎立等。妥為鈴束。毋令再生事端。該軍滋事勇丁。雖經查獲懲辦。而辦理不善之將弁。咎亦難辭。著李鴻章。慎遵前旨。據實參辦。毋稍瞻徇。其搶掠鋪戶各事。除魯萬澄五人外。是否尚有起意之人。仍著潘鼎立等徹底查拏。解赴東省。由丁寶楨按律嚴辦。該勇丁行抵皖境。英翰。吳坤修。務當斟酌情形。妥籌安插。一面飭知潘鼎新。隨同遣散。俾得各安生業。將此由五百里諭知李鴻章。馬新貽。丁寶楨。英翰。並傳諭吳坤修知之。○庚寅。諭軍機大臣等。戶部奏。請飭催各省應解京餉一摺。上年十二月間。經戶部奏撥本年京餉銀七百萬兩。限五月前解到一半。年終解清。本年五月間。續撥銀一

百萬兩。限年內解齊。茲據該部查明。截至七月十八日止。除天津關十五萬兩。准其留用。長蘆鹽課二十五萬兩。內劃撥造船經費等款外。餘銀並福建鹽課。均已解清。湖北安徽地丁。浙江釐金。兩浙鹽課。鹽釐。河東加課羨餘。四川鹽釐。津貼。福建茶稅。九江關常洋兩稅。報解過半。山東浙江地丁。廣東鹽課。帑息。山東鹽課。加價。湖北鹽釐。閩海關常洋兩稅。江漢關洋稅。亦據報解及半。其餘山西等省地丁。兩淮等處鹽課。粵海等處關稅。或解不及半。或絲毫未解。京餉關繫緊要。豈得任意延宕。除業經劃撥截留解到及報解外。尚有山西地丁銀六十萬兩。山東地丁銀十五萬兩。浙江地丁銀十五萬

兩。湖北地丁銀十四萬九千五百兩。湖南地丁銀十九萬兩。安徽地丁銀五萬兩。江西地丁銀二十萬兩。兩淮鹽課。鹽釐。銀四十萬兩。兩浙鹽課。鹽釐。銀十四萬兩。河東加課羨餘。銀五萬兩。廣東鹽課。帑息。銀十萬兩。山東鹽課。加價。銀十萬五千兩。湖北鹽釐。銀五萬兩。湖南鹽釐。銀四萬兩。四川鹽釐。津貼。銀十七萬兩。福建茶稅。銀二萬兩。粵海關稅。銀十萬兩。閩海關常洋兩稅。銀十萬兩。九江關常洋兩稅。銀十六萬二千五百四十八兩零。浙海關洋稅。銀十五萬兩。江海關洋稅。銀二十一萬一千四百八十八兩零。江漢關洋稅。銀十五萬兩。江西釐金。銀五萬兩。江蘇釐金。銀五萬兩。浙江釐金。銀四萬

八千六百四十七兩零。廣東釐金銀十萬兩。湖北釐金銀三萬兩。又續撥京餉一百萬兩內。除山東起解銀三萬兩。四川劃解西藏銀五萬兩外。尚有山東地丁銀七萬兩。河南地丁驛站銀十六萬兩。兩浙鹽課鹽釐銀五萬兩。福建釐捐銀五萬兩。浙江茶課銀五萬兩。兩淮鹽釐銀二十萬兩。四川鹽釐津貼銀十萬兩。九江關常洋兩稅銀二十萬兩。贛關稅銀四萬兩。著各該將軍督撫監督等。即將前項應解銀兩。統於年內埽數解齊。毋得遲延干咎。將此由五百里諭知福州將軍。兩江湖廣閩浙兩廣四川江蘇安徽江西福建浙江湖北湖南山東山西河南廣東各督撫。並傳諭粵海關監督知之。

又諭。前因理藩院奏。據阿拉善親王呈稱。歷次籌墊臺費銀五萬餘兩。當經諭令戶部指款撥還。茲據奏稱。查有圖謝圖汗等部落。應抵解部庫銀五萬兩。約計尚未起程。請將此項抵撥等語。著張廷岳。阿爾塔什達。即將前項銀五萬兩。迅速派員改解綏遠城。卽由定安派員解送甯夏。並將銀兩起程日期。先行知照金順。豐紳。酌派弁兵。會同綏遠城委員。護送至阿拉善旗交收。毋稍疏忽。將此各諭令知之。○以湖北蕪水拏獲教匪出力。予守備萬賦元等升敘有差。○辛卯。諭軍機大臣等。張廷岳等奏。東兩盟願領厄魯特人眾一摺。厄魯特人眾。分起安插。業經福濟等將西兩盟分領情形具奏。現

在圖謝圖汗車臣汗東兩盟亦願呈領厄魯特所贖一半人數分布安輯。辦理甚屬妥協。卽著張廷岳阿爾塔什達傳知各該王公等。於該人眾到旗後。妥為撫綏約束。務令日久相安。並著福濟錦丕勒多爾濟文碩錫綸等。將此項人眾按照該兩盟佐領多寡。均攤勻散。造具名冊。一俟庫倫咨到。卽交該管官帶領陸續起程。俾臻安速。將此由五百里各諭令知之。○命候補國子監司業孫詒經仍在南書房行走。○壬辰諭內閣。魁玉奏京口駐防難裔。應行承襲各員。請仿照江甯駐防變通成案。試用三年。再行送部引見。其已經承襲之興元。長年二名。並請歸試用班當差。各等語。著兵部查明江甯

駐防成案。一律辦理。○諭軍機大臣等。魁玉奏請籌款興建駐防官署。並添補器械一摺。京口駐防兵房。現已一律工竣。惟各兵丁雖有棲止。而官署尚未建葺。器械亦復短缺。難資辦公。卽著馬新貽。丁日昌續行籌款。遴派妥員。前往估計工程。將京口駐防各官署。及應行添補器械。趕緊興造。並著魁玉督飭在工各員。認真辦理。毋令草率。俾復舊觀。將此各諭令知之。○又諭定安桂成奏。賊匪竄擾河西。各軍分投進剿。並請飭撥火藥等項各摺片。甘陝回匪。經張曜等軍截擊後。未敢北犯。意圖乘隙東趨。現在鄂爾多斯等旗境內。均有賊蹤。其竄擾哈拉寨等處之賊。雖經宋慶所部擊敗。仍退向鹽

寶錄卷之三十三
海子一帶盤踞。杜嘎爾刻由托克托城渡黃。馳赴河西。正可杜該逆東擾之路。卽著定安等迅咨該副都統督飭達爾濟等。各率所部馬隊。探明賊蹤。相機進紮。仍一面會合宋慶等軍步隊。節節追勦。以殄逆氛。惟河西與歸綏僅隔一河。防守甚關緊要。且該處南路直達榆林。東北卽趨包薩。該逆詭譎異常。難保不避兵而行。乘虛分擾。榆林為逆匪往來熟徑。劉典務當偵探賊蹤。豫籌防範。毋稍疏虞。其歸綏包薩沿河一帶地方。仍著定安。桂成。李宗義。分飭在事將士。加意嚴防。左宗棠督軍西進。設陝境復有蠢動。後路仍費周章。應如何先事圖維。撥軍嚴扼之處。著該大臣察度情形。商同劉典妥為

辦理。金順現由烏喇一帶進勦。著卽會同張曜等軍分投截擊。以壯聲援。定安等所請火藥等項。本日已諭知工部照數迅撥矣。其山西應解火藥鉛丸等件。李宗義卽按照該將軍等所咨。隨時撥解。以濟要需。將此由六百里各諭令知之。○又諭。定安。桂成奏。請飭山東山西撥解防兵欠餉。並請飭山西速解歸綏滿蒙旗綠等營防餉各等語。口外防兵。經定安等裁撤老弱。酌留六千餘名。分布沿河地面。山西積欠兵餉。共銀十萬餘兩。山東每月應解銀二萬六千兩。除解到正月分協餉一萬兩及起解未到銀一萬兩外。所欠尚多。口外防務緊要。亟宜接濟。以資飽騰。著丁寶楨。李宗義。將各該省欠

解定安等防兵月餉。嚴飭各該藩司。勒限如數趕緊撥解。毋任延宕。嗣後月餉。務須源源起解。俾濟要需。至山西欠解伊克昭烏蘭察布兩盟兵餉銀十二萬四千餘兩。綏遠右衛土默特大同鎮各營兵餉二萬三千餘兩。並著李宗義嚴飭藩司。勒限撥解。毋再遲緩。將此由五百里各諭令知之。○又諭何瑄奏西路軍務情形。請飭催成祿出關一摺。據稱烏魯木齊各城。久為賊踞。實因大兵阻於關內。以至塞外逆氛猖獗。近日該總兵派軍功鄧生玉等。赴奇古濟木薩一帶扼紮。於木壘河地方將賊擊退。又在奇台擊賊獲勝。惟成祿出關尚無信息。請飭剋期西進等語。成祿克復肅州後。一切部署。自

已妥協。何得任意遷延。至今無出關消息。著成祿懍遵前旨。乘此塞外兇鋒已挫。迅統所部出關。會同何瑄相度機宜。分別勦撫。妥速辦理。若再株守不進。玩誤軍務。自問當得何罪。並著左宗棠。穆圖善。嚴催該提督迅速起程。不得任令延宕。何瑄於成祿未到之先。仍宜督飭將弁認真防勦。將此由五百里諭知左宗棠。穆圖善。成祿。並傳諭何瑄知之。○以哈木爾和碩等處勦賊獲勝。賞協領克什克扎布等副都統銜。參將洪亮等花翎。餘升敘有差。○撥工部火藥鉛丸各一萬斤。火繩一萬丈。轟藥二百斤。解赴綏遠城軍營備用。○豁免湖南晃州廳被擾地方上年民欠錢糧。○癸巳。以四川劍州捐

輸軍餉。永廣學額二名。○甲午。以神靈顯應。封浙江桑神曰桑王之神。○諭內閣。給事中劉東厚奏。風聞直隸地方徵收錢糧。浮費漸增。永平遵化河間等屬。有加至二三錢三四錢者。又或有津貼名目。更加二三錢不等。至收錢作銀折價。每銀一兩。幾費二三兩銀之數。又錢糧交官。例給串票。乃敢另索使費。逐漸加增。京畿如此。他省可知。請旨查禁等語。直隸差務紛繁。屢遭兵燹。當此瘡痍未起。正宜竭力撫綏。以冀漸復元氣。何得以有限之脂膏。供無饜之腹削。著曾國藩按照該給事中所奏情形。查明嚴禁。並著各直省督撫。各率所屬。裁減浮費。明定章程。刊示市鎮通衢。俾小民得以周知。胥隸

無從舞弊。如有額外需索者。一經發覺。即予從嚴叅辦。以副朝廷軫念黎元至意。○又諭。前據李鶴年奏。遵查直隸山西河南交界處所。山徑叢雜。匪徒每易藏奸。當經諭令曾國藩等妥議會哨章程。認真辦理。茲據曾國藩酌擬章程。開單具奏。所稱接壤州縣。會銜出示。不分鄰省本省。一律會哨。令地方文武輪流出巡。按月稟報。及每次會哨。不拘地面。聯絡鄉團。以為鄉導。各條均屬周妥。著照所議。由各該督撫飭令該地方官。各按章程。約期會哨。不分畛域。實力奉行。務令奸宄無從匿跡。以副朝廷除暴安良至意。其餘未盡事宜。仍著曾國藩。李宗羲。李鶴年。隨時會商。妥為辦理。○諭軍機大臣等。

給事中劉秉厚奏。山東東昌府及歷城縣之濼口鎮。利津縣之豐國鎮。自咸豐年間。設立抽釐分局。尚未停止。計每日各局所收。俱不下千餘金。而吏役之藉端訛詐。格外勒索。較前更甚。請飭量為裁撤等語。著丁寶楨體察地方情形。將各該處分局。酌量裁撤。以恤商力。將此諭令知之。尋奏。遵查豐國鎮並無釐局。現擬將聊城釐卡裁撤。其濼口鎮等處。應請暫留以濟餉需。並嚴飭委員訪查吏役情弊。從嚴懲辦。下部知之。○又諭。棍噶扎勒參奏。進勦叛民獲勝。派員開導。請飭撥弓箭各摺片。叛民竄擾土爾扈特遊牧地方。經棍噶扎勒參會同蒙兵。於六月十五日進勦。殺賊七十餘名。與錫綸前奏。

大略相同。該匪現在敗退回巢。棍噶扎勒參以兵力尚單。未能進取。現擬添調厄魯特官兵二百名。一面派員前往開導。著福濟文碩錫綸傳知該呼圖克圖。先行扼要堵守。一遇該匪出巢。卽著迎頭截擊。毋任紛竄。俟厄魯特官兵調到。仍當相機進勦。迅掃逆氛。該呼圖克圖需用弓箭。前據錫綸奏稱。已先後撥給弓二百張。箭五千枝。如再有需用之處。著福濟錦丕勒多爾濟文碩錫綸酌量撥給。綏遠城前次截留火箭三百枝。據棍噶扎勒參奏稱。已接該將軍咨文。業經起運。久未解到。著定安飭令委員迅速解往。毋稍遲延。棍噶扎勒參另摺奏。土爾扈特郡王巴圖捐助馬匹。隨同勦賊出力。已諭

令理藩院議給獎敘。又奏索倫等營官兵出力。所有總管圖瓦強阿等。業照所請給獎。其在塔城勦賊出力官兵。俟軍務告歲。卽由福濟等酌保。著該將軍等一併傳知該呼圖克圖。將此由五百里各諭令知之。○補鑄安徽宣州衛守備印信。從署巡撫吳坤修請也。○以直隸新城捐築隄工。予知縣吳光鼎等加級加銜有差。○以布倫托海進勦叛民獲勝。賞總管圖瓦強阿。佐領迪布希巴圖魯名號。委領催額勒和里等。藍翎。餘升敘有差。○緩徵陝西蒲城縣被旱地方。本年上忙錢糧。○乙未。

仁宗睿皇帝忌辰。遣官祭。

昌陵。

上詣

壽皇殿行禮。○諭內閣。奕榕奏。查明牧廠准領地畝。有礙牧放。請仍照例封禁。並將牧長革職訊辦一摺。大凌河西牧廠。以老河身為界。前因旗人胡拉布等呈請領墾三河套舊河底地二千八百餘畝。經盛京戶部覈准升科。現據奕榕覆行查勘。該處開墾地畝。日久恐侵廠地。實於牧政大有關礙。自應仍行封禁。著戶部查明。將該旗人等領地升科之案。卽行註銷。所墾之地。一律平毀。並著該將軍府尹飭令旗民地方官。照例將馬廠界限。挑挖濠溝。重整封堆。自舊河底以西。不准

再行領墾。以重牧政。而杜奸萌。牧長卓金。當承墾時。派往查勘。據稱不礙牧馬。此次覆查出結。又復獨執一詞。意存迴護。顯有營私情弊。著卽革職。嚴行訊辦。○丙申。諭軍機大臣等。李宗義奏。籌商河防。並添募晉勇情形一摺。前因回匪竄擾河西。諭令李宗義分飭在事將士。加意嚴防。茲據該撫奏稱。陳湜所部。均已遣撤。業經鄭敦謹抽派南鎮官兵。並留精銳等營。及水師十一營。分路駐紮。所有河防。分為下段中段上等段。令李慶翱等商酌辦理。其上年所築沿河石壘。並飭地方文武一律修補。所奏各情。尚屬周妥。惟陝省北境。與晉省處處相通。防守自難鬆勁。中段興臨等處。河面較寬。而南路吉

州之龍王辿。河津之禹門渡。每冬冰橋早結。堵禦尤難。卽著該撫飭令李慶翱嚴檄閻文忠等。趕募晉勇四千名。於八月內成軍。並調河東練勇二百名。統交該臬司在吉鄉河津之間。分段扼紮。以固南路。現在賊竄鄂爾多斯旗境。距陝之府谷神木等邑不遠。晉省北路。如河曲沔陽渡等處。尤應嚴防。如需添調兵勇。亦必豫為籌及。毋致臨時周章。晉省人多怯懦。所募勇丁四千。是否得力。營兵於額餉外日加銀八分。以示體恤。原無不可。惟須汰弱留強。一兵得一兵之用。斯為餉不虛糜。該撫其督飭李慶翱實力奉行。毋負委任。歸綏一帶。仍當與定安等隨時籌防。並知照張曜。宋慶各軍。與該處防

實錄卷之三十三
三
勦等營。互相聯絡。俾壯聲援。再兵之強弱。轉移在將。該省現在有無得力將弁。亦當隨時留意察看。用資調遣。將此由五百里諭令知之。○山西巡撫李宗羲奏。回匪侵入蒙境。官軍截擊獲勝。得旨著卽知照。宋慶督飭蔣東才等實力進勦。毋任逆賊東趨。○丁酉。諭軍機大臣等。都興阿等奏。奉天拏獲賊匪。請仍照軍務省分。援照成案辦理一摺。據稱奉天地方。股匪橫行。雖經官兵節次勦除。而賊匪尚未淨絕。所有該省拏獲馬賊及土匪。擾害鄉里。勒索貨財。降勇聚眾滋事者。於訊明後。仍請照軍務省分。援照成案。就地正法。並請飭吉林黑龍江將軍一體遵辦等語。匪徒擾害閭閻。最堪痛恨。奉天

根本重地。尤應除莠以安善良。嗣後奉天拏獲賊匪。卽著照都興阿等所請。從嚴懲辦。如遇有臨時拒捕者。卽行格殺勿論。惟該匪此拏彼竄。是其慣技。吉林黑龍江地方。豈容此等匪徒肆行擾害。著富明阿。德善。按照奉天所辦章程。一律辦理。如日後該三省盜風稍息。再由該將軍等隨時奏明。以復舊章。將此各諭令知之。○又諭。都興阿等奏。奉省演練馬兵。應添藥鉛。請飭工部辦理一摺。盛京馬隊練兵八百名。逐日常川操演。應需火藥鉛丸甚多。勢難由該旗佐永遠墊辦。著奕慶按月如數給發。其火藥一項。並著按照前備勦捕賊匪加工做法。覈實製造。俾資應用。將此諭令知之。○又諭。李鴻

章奏。遵籌遣撤鼎軍。大致就緒一摺。潘鼎新一軍。前在山東韓莊地方搶掠。隨赴江蘇宿遷。經丁寶楨馬新貽先後撥給餉銀。妥為遣散。現將首先搶掠之勇目魯萬澄等正法。各營勇丁。咸知畏懼。吳長慶等已知會各路營卡。並沿途州縣。遞為護送回籍。是此事已辦有端緒。惟該勇丁雖因缺餉滋事。而營哨官之平日不能約束。已可概見。若不從嚴叅辦。何以申明軍律。且何以服韓莊各鋪戶之心。卽著李鴻章飭令潘鼎新於安置事竣後。查明嚴行叅辦。不可稍涉徇庇。另摺奏。彭玉麟回籍情形。該侍郎感激知遇。力疾自浙蘇上泝岳州。逐營查驗。親為勉勵。實能不負委任。現在病體未愈。自應准

其就近回籍調理。惟長江水師。係該侍郎等經營創立。著李鴻章傳諭彭玉麟。於病體略痊。仍遵前旨。馳赴江皖。擇地駐紮。以資控制。將此由五百里諭令知之。○又諭。英桂。卞寶第。奏。緝拏游勇土匪情形。請從嚴懲辦一摺。福建興漳泉三府屬地方。民情强悍。搶案頻仍。延建邵等府。每逢茶市。卽有本省汀州及廣東江西客民數萬人。前來傭工。於市罷後。匿居山廠。伺隙搶劫。甚至糾眾肆擄。本年五月間。建陽縣地面。拏獲會匪張淙保等。據供聽從江西客匪吳三保結眾拜盟。名勝人會。訂期焚搶黃阮。再攻崇安。並續獲會匪范運發等。一併訊明正法。該省匪徒充斥。兼有各路散勇流入。難保不勾

結為患。自應從嚴懲辦。以杜亂萌。著英桂。下寶第。督飭各該地方文武認真查緝。並於拏獲匪犯後。卽行就地正法。用昭炯戒。俟盜風稍息。再行奏明辦理。其在逃之匪首吳三保。已據該督撫咨會江西緝拏。著劉坤一飭屬將該匪嚴拏務獲懲辦。毋任漏網。將此各諭令知之。○以緝捕不力。摘中城副指揮姬瑞麟頂帶。○己亥。諭軍機大臣等。定安。桂成。奏。豫軍截勦竄匪獲勝詳細情形一摺。回匪竄擾鹽海子一帶。經提督蔣東才等追勦。斃賊甚多。據獲賊供稱。賊首穆壽。馬老。均已陣斃。惟李五舉及餘匪均向西南逃竄。現在復有回匪竄至烏紳旗境打虎旗一帶。蔣東才已帶所部探勦。宋慶又派

三營前往會勦。著卽飭令迅速前進。務將竄擾該處之賊。痛加勦洗。悉數殲除。並咨令杜嘎爾督飭達爾濟等。各率所部聯絡宋慶張曜兩軍。確探賊蹤。迅速兜擊。毋任分股東趨。河西賊股不一。常在磴口等處掠糧。全順前由達拉特旗進發。現在行抵何處。近日勦辦情形若何。著懍遵疊次諭旨。會同張曜等軍。分投截勦。妥籌策應。歸綏沿河一帶。定安等仍當督飭各軍加意嚴防。毋稍大意。宋慶派員勦賊。頗知緩急。此次在鹽海子殺賊出力員弁。著准其擇尤彙案保奏。將此由五百里各諭令知之。○予江蘇各屬陣亡殉難紳民楊式金等暨婦女一千八百九十一名口分別旌卹如例。

大清穆宗繼天開運受中居正保大定功聖智誠孝信敏恭寬
毅皇帝實錄卷之二百六十三

